

# Neno La Mungu Lilimjia Nabii

William Marrion Branham

## *"Itwae Kalamu Yako Uandike"*

*Usiku mmoja nilipokuwa nikimtafuta Bwana, Roho Mtakatifu aliniambia niitwae kalamu yangu niandike. Nilipoitwaa kalamu mara moja kuandika, Roho Wake akanipa ujumbe kwa ajili ya kanisa. Nataka kuwaleteeni ninyi huo. Unahusu Neno na Bibi-arusi.*

Haya ndiyo ninayojaribu kuwaambieni. Sheria ya kuzaa ni kwamba kila aina izae ya aina yake yenye, kulingana na Mwanzo 1:11, "Mungu akasema, Nchi na itoe majani, mche utoao mbegu na mti wa matunda uzaao matunda kwa jinsi yake, ambao mbegu zake zimo ndani yake, juu ya nchi, ikawa hivyo." Uhai wo wote ule uliokuwemo katika mbegu ulijitokeza katika mmea na baadaye katika tunda. Sheria iyo hiyo inatumika kwa kanisa leo. Mbegu yo yote iliyoanzisha kanisa itamea na kuwa kama mbegu ya asili kwa sababu ni mbegu ile ile. Katika siku hizi za mwisho Kanisa Bibi-arusi la kweli (mbegu ya Kristo) litafikia kwenye Jiwe la Kileleni, nalo litakuwa kanisa maalum, uzao maalum, linapomkaribia Yeye. Wao katika bibi-arusi watafanana sana Naye hata watakuwa katika mfano Wake kabisa. Hii ni kusudi wapate kuungana Naye. Watakuwa mmoja. Watakuwa dhihirisho kamili la Neno la Mungu aishiye. Madhehebu hayawesi kulizaa hili (uzao mbaya). Watazaa kanuni zao za imani na mafundisho yao ya sharti, yaliyochanganywa na Neno. Huku kuchanganyisha huzaa uzao uliochanganyika.

Mwana wa kwanza (Adamu) alikuwa mzao-Neno lililonenwa la Mungu. Alipewa bibi-arusi kusudi ajizae. Hiyo ndiyo sababu yeye alipewa bibi-arusi, apate kujizaa, amzae mwana mwingine wa Mungu. Lakini huyo alianguka. Alianguka kwa kuchanganya mbegu. Alimfanya mumewe afe.

Mwana wa pili (Yesu), pia Mzao-Neno lilionenwa la Mungu alipewa bibi-arusi kama vile Adamu alivyopewa. Lakini kabla hajaweza kumwoa, yeye pia alikuwa ameshaanguka. Yeye, kama mke wa Adamu, alijaribiwa kuona kama angeliamini Neno la Mungu na kuishi, au alitilie shaka Neno akafe. Yeye alishuku. Aliliacha Neno. Akafa.

Toka kwenye kundi dogo la wazao halisi wa Neno, Mungu atamtuza Kristo na bibi-arusi mzuri. Yeye ni bikira wa Neno Lake. Yeye ni bikira kwa sababu hazijui kanuni zo zote za ima ni zilizobuniwa na wanadamu wala mafundisho ya sharti. Katika na kwa kupitia kwa washiriki wa bibi-arusi yatatimizwa yale yote yaliyoahidiwa na Mungu kudhihirishwa katika bikira.

Neno la ahadi lilimjia bikira Mariamu. Lakini hilo Neno la ahadi lilikuwa ni Yeye, Mwenyewe, kudhihirishwa. Mungu alidhihirishwa. Yeye, Mwenyewe, alitenda kwa wakati huo na kulitimiza Neno Lake la ahadi katika bikira. Malaika ndiye aliyemletea ujumbe. Lakini ujumbe wa malaika ulikuwa ni Neno la Mungu. Isaya 9:6. Yeye aliyatimiza wakati huo yote yale yaliyoandikwa kumhusu Yeye kwa sababu bikira alilikubali Neno Lake aliloletewa.

Washiriki wa bibi-arusi bikira watampenda Yeye, nao watakuwa na uweza Wake, kwa maana Yeye ndiye kichwa chao, na nguvu zote ni Zake. Wanamtii Yeye kama vile viungo vyta miili yetu vinavyotii vichwa yetu.

Angalia upatano wa Baba na Mwana. Yesu hakufanya lo lote mpaka aonyeshwe kwanza na Baba. Yohana 5:19. Upatano huu unatakiwa sasa uwepo kati ya Bwana Arusi na bibi-arusi Wake. Yeye anamwonyesha Neno Lake la uzima. Naye analipokea. Yeye halishuku kamwe. Kwa hiyo, hakuna kitakachowezwa kumdhuru, hata mauti. Kwa kuwa kama mbegu imepandwa, maji yataifufua tena. Siri ya jambo hili ndiyo hii. Neno limo katika bibi-arusi (kama vile lilivyokuwa katika Mariamu). Bibi-arusi ana nia ya Kristo kwa kuwa anajua kile Yeye anachotaka kifanywe kwa Neno.

Anatekeleza maagizo ya Neno katika jina Lake kwa kuwa yeye anayo "Bwana asema hivi." Ndipo Neno linahuishwa na Roho nalo linatimia. Kama mbegu ambayo imepandwa na kumwagiwa maji, linafikia mavuno kamili, likitimiza kusudi lake.

Wale walio katika bibi-arusi hufanya tu mapenzi Yake. Hakuna ye yote anayeweza kuwafanya watende vinginevyo. Hao wana "Bwana asema hivi" la sivyo wananyamaza. Wanajua ya kwamba hapana budi iwe ni Mungu ndani yao anayefanya hizo kazi, akitimiza Neno Lake Mwenyewe. Yeye hakumaliza kazi Zake zote alipokuwa katika huduma Yake ya duniani kwa hivyo sasa Yeye hutenda kazi katika na kuititia kwa bibi-arusi. Bibi-arusi ajua hayo, kwa sababu wakati Wake wa kufanya mambo mengine ambayo hana budi kuyafanya sasa haukuwa umewadnia. Lakini sasa Yeye atatimiza kuititia kwa bibi-arusi kazi ile aliyoia ili ifanywe kwa wakati huu uliokusudiwa.

Basi na tusimame kama Yoshua na Kalebu. Nchi yetu ya ahadi imeanza kuonekana kama vile yao ilivyoanza kuonekana. Basi Yoshua maana yake ni "Yehova-Mwokozi," naye anawakilisha kiongozi wa wakati wa mwisho ambaye atakuja kwa kanisa kama vile Paulo alivyokuja kama kiongozi wa kwanza. Kalebu anawakilisha wale waliomtii Yoshua. Kumbuka, Mungu alikuwa amewaanzilisha Israeli kama bikira kwa Neno Lake. Bali wao walitaka kitu tofauti. Vivyo hivyo na kanisa la siku za mwisho nalo. Angalia jinsi Mungu hakuwasogeza Israeli, wala kuwaacha waingie katika nchi ya ahadi mpaka wakati Wake Mwenyewe uliokusudiwa ulipowadia. Sasa huenda hao watu walimshurutisha Yoshua, aliyekuwa kiongozi, na kusema, "Nchi ni yetu, hebu na twende tukaichukue. Yoshua, umeshindwa, huna budi umepoteza agizo lako, huna ile nguvu uliyokuwa nayo. Ulikuwa ukisikia toka kwa Mungu na kujua mapenzi ya Mungu, na kutenda kwa haraka. Una kasoro." Lakini Yoshua alikuwa ni nabii aliyetumwa na Mungu naye alijua ahadi za Mungu, kwa hiyo alizingojea. Yeye alingojea uamuzi dhahiri toka kwa Mungu na wakati ulipofika wa kusonga mbele, Mungu aliuweka uongozi kamili katika mikono ya Yoshua kwa sababu alikuwa amekaa na Neno. Mungu aliweza kumwamini

Yoshua lakini si hao wengine. Kwa hiyo itajirudia katika siku hizi za mwisho. Shida ile ile, na msongo ule ule.

Chukua mfano tuuonao katika Musa. Huyu nabii mkuu wa Mungu aliyepakwa mafuta alizaliwa kiajabu, akishazaliwa kwa wakati uliofaa kwa ajili ya ukombozi wa uzao wa Ibrahimu toka Misri. Yeye hakukaa Misri kuhojiana nao kwa Maandiko, wala kuzozana na makuhani. Yeye alienda jangwani hata watu walipokuwa tayari kumpokea. Mungu alimwita Musa aende jangwani. Kungoja kule hakukuwa kwa Musa bali ni kwa sababu ya watu waliokuwa hawajawa tayari kumpokea. Musa alidhani kuwa hao watu wangefahamu bali hawakufahamu.

Kisha kuna Eliya ambaye alijiliwa na Neno la Bwana. Alipomaliza kuhubiri ukweli na hilo kundi kule nyuma ambalo linatangulia kundi la Yezebeli wa Marekani halingeweza kulipokea Neno, Mungu alimwita aondoke uwanjani kisha akakipiga kizazi hicho kwa ajili ya kumkataa nabii na ujumbe aliopewa na Mungu. Mungu alimwita aende jangwani naye hangeweza kutoka hata kama angeitwa na mfalme. Wale waliojaribu kumshawishi afanye hivyo, walikufa. Lakini Mungu alinena na nabii Wake mwaminifu kwa ono. Toka mafichoni alikuja na kuwarejeshea Neno Israeli.

Kisha akaja Yohana Mbatizaji, mtangulizi mwaminifu wa Kristo, nabii mkuu katika wakati wake. Yeye hakwenda kwenye shule ya baba yake, wala kwenye shule ya Mafarisayo—hakwenda kwenye madhehebu yo yote, bali alikwenda huko nyikani alipoitwa huko na Mungu. Alikaa huko hata Bwana akamtuma huko nje na ujumbe, akilia, "Masihi amekaribia."

Basi hebu nasi tuchukue onyo la Kimaandiko hapa. Je, haikuwa katika siku za Musa ambaye Mungu alikuwa amemthibitisha ambapo Kora aliinuka na kumpinga huyo nabii mwenye nguvu? Alibishana na Musa na kudai kuwa yeye pia alikuwa na mambo yale yale kutoka kwa Mungu kuwaongoza hao watu na ya kwamba wengine walishiriki katika ufunuo wa Kiungu kama vile Musa alivyoshiriki. Alikana mamlaka ya Musa. Basi hao watu kule nyuma,

baada ya kusikia Neno la kweli nao walifahamu vizuri ukweli kwamba nabii wa kweli alikuwa amethibitishwa na Mungu, ninasema watu hao walimfuata Kora na ukaidi wake. Kora hakuwa nabii wa Kimaandiko bali umati mkubwa wa watu pamoja na viongozi wao walimfuata. Ni sawa vipi na wainjilisti siku hizi wakiwa na miradi yao ya ndama wa dhahabu kama wa Kora. Wanaonekana wazuri kwa watu kama vile Kora alivyoonekana wakati huo. Wana damu katika paji za nyuso zao, mafuta mikononi mwao na mipira ya moto jukwaani. Wanawakubalia wahubiri wanawake, wanawaruhusu wanawake wanyoe nywele zao, na kuvala suruali kaptura, na kulipuza Neno la Mungu kwa ajili ya kanuni zao za imani na mafundisho ya sharti. Hiyo yaonyesha aina ya mbegu iliyomo ndani yao. Bali sio watu wote waliomkataa Musa na kuliacha Neno la Mungu. La. Wateule walikaa naye. Jambo lilo hilo linatendeka leo. Wengi wanaliacha Neno bali wengine wanakaa nalo. Lakini kumbuka mfano wa ngano na magugu. Magugu hayana budi kukusanya matita matita yapate kuteketezwa. Makanisa haya yaliyoanguka yanafungwa pamoja karibu-karibu, tayari kwa ajili ya moto wa hukumu ya Mungu. Bali ngano itakusanya kwa Bwana.

Sasa ninataka mwe waangalifu sana hapa na mlione hili. Mungu ameahidi ya kwamba mwishoni mwa wakati Malaki 4 itatimilika. Haina budi kutimia kwa kuwa ni Neno la Mungu lililohuishwa na Roho na kunenwa na nabii Malaki. Yesu alitaja hilo. Ni kabla tu ya kuja kwa Kristo pili. Ifikapo wakati wa kuja Kwake Yesu Maandiko yote hayana budi kutimizwa. Muda wa Mataifa utakuwa katika wakati wake wa kanisa la mwisho wakati huyo mjumbe wa Malaki atakapokuja. Yeye atakuwa moja kwa moja na Neno. Ataichukua Biblia yote tangu Mwanzo hadi Ufunuo. Ataanzia kwenye uzao wa nyoka na kuendelea hata kwenye mjumbe wa mvua ya masika. Bali atakataliwa na madhehebu.

Hana budi kukataliwa kwa kuwa hiyo ni historia ikijirudia yenyewe kutoka wakati wa Ahabu. Historia ya Israeli chini ya uongozi wa Ahabu inatendeka papa hapa Marekani ambapo nabii

wa Malaki anatokea. Kama vile Israeli walipoondoka Misri waende wakaabudu kwa uhuru, wakawafukuza wenyiji, wakajenga taifa lenye viongozi shujaa kama Daudi nk., kisha wakamweka Ahabu kwenye kiti cha enzi na Yezebeli nyuma yake akimwongoza, vivyo hivyo tumefanya jambo lile lile Marekani. Babu zetu walikuja katika nchi hii wapate kuabudu na kuishi katika uhuru. Waliwafukuza wenyiji na kuitwaa nchi. Watu wenye nguvu kama vile Washington na Lincoln waliinuliwa lakini baadaye watu wengine watovu sana wa akili waliwafuata watu hawa mashuhuri hata punde si punde Ahabu aliwekwa kwenye kiti cha urais na Yezebeli nyuma yake kumwongoza. Ni katika wakati kama huu ambapo mjambe wa Malaki hana budi kuja. Ndipo katika mvua ya masika kutatokea shindano dhahiri la Mlima Karmeli. Chunguza hili kwa makini sasa upate kuliona katika Neno. Yohana alikuwa mtangulizi wa Malaki 3. Yeye alipanda mvua ya vuli na kukataliwa na mashirika ya siku zake. Yesu alikuja na akawa na shindano dhahiri la Mlima wa Kugeuzwa. Mtangulizi wa pili wa kuja kwa Kristo atapanda kwa ajili ya mvua ya masika. Yesu atakuwa shindano dhahiri kati ya madhehebu na kanuni za imani, kwa kuwa Yeye atakuja kulidhihirisha Neno Lake na kumtwaa Bibi-arusi Wake katika kunyaakuliwa. Shindano dhahiri la kwanza lilikuwa kwenye Mlima wa Karmeli; la pili lilikuwa kwenye Mlima wa Kugeuzwa, na la tatu litakuwa kwenye Mlima wa Sayuni.

Tabia za ajabu za Musa, Eliya, na Yohana za kujitenga na watu na kuishi kwa upweke ziliwaacha wengi wametatanika. Wao hawakutambua kwamba ni kwa sababu ujumbe wao ulikuwa umekataliwa. Lakini mbegu ilikuwa imepandwa, kupanda kulikuwa kumemalizika. Hukumu ilikuwa inafuata. Walikuwa wamemaliza kazi yao kama ishara kwa watu, kwa hiyo hukumu ilikuwa inafuata.

Ninaamini kulingana na Ufunuo 13:16 ya kwamba itambidi Bibi-arusi kuacha kuhubiri kwa maana yule mnyama anadai chapa katika mkono au paji la uso ikiwa ruhusa ya kuhubiri itatolewa. Madhehebu yataichukua ile chapa, la sivyo yatalazimishwa kuacha kuhubiri. Ndipo Mwana-Kondoo atakuja kumchukua Bibi-arusi Wake na kumhukumu yule kahaba mkuu.

Basi kumbuka ya kwamba Musa alizaliwa kwa ajili ya kazi fulani, lakini hangeliweza kufanya kazi hiyo mpaka amekwisha kupokea vipawa ambavyo vingemwezesha kuifanya hiyo kazi. Ilimpasa yeze aende jangwani na kungoja huko; Mungu alikuwa na wakati ulichaguliwa. Kulikuwa kuwe na Farao fulani kwenye kiti cha enzi, na iliwapasa watu wawe wakililia mkate wa uzima, kabla Mungu hajamtuma. Ndivyo ilivyo katika siku zetu.

Lakini tuna nini siku hizi zetu? Umati mkubwa unafanya ishara hata tuna kizazi cha watafuta ishara wanaojua machache ama hawajui lo lote kuhusu Neno, wala mwenendo halisi wa Roho wa Mungu. Wakiona damu, mafuta na moto wao wanafurahi; haijalishi ni nini kilicho katika Neno. Wataunga mkono ishara yo yote, hata zile zisizo za kimaandiko. Lakini Mungu ametuonya kuhusu jambo hilo. Yeye alisema katika Mathayo 24 kwamba katika siku za mwisho zile roho mbili zitafanana sana hata ni walio wateule tu wangeweza kuzitofautisha, kwa kuwa ni wao pekee ndio ambao hawatadanganya.

Unawezaje kuzitofutisha hizo roho? Hebu na uzipe tu jaribio la Neno. Kama hazineni hilo Neno, ni za yule mwovu. Kama vile yule mwovu alivyowadanganya wale bibi-arusi wawili wa kwanza, yeze atajaribu kumdanganya bibi-arusi wa siku hizi za mwisho, kwa kujaribu kumfanya ajichanganyishe katika kanuni za imani, ama kwa kuliacha Neno dhahiri na kufuata ishara yo yote inayomfaa. Lakini Mungu hakuziweka ishara mbele ya Neno. Ishara hufuata Neno, kama wakati Eliya alipomwambia yule mwanamke amtengenezee mkate kwanza, kulingana na Neno la Bwana. Alipofanya vile Neno lilivyosema, ishara sahihi ikaja. Njoo kwenye Neno kwanza kisha uangalie muujiza. Mbegu Neno hutiwa nguvu na Roho.

Yawezekanaje mjumbe ye yote aliyetumwa toka kwa Mungu kuamini tu sehemu ya Neno na kukana sehemu yake? Nabii wa kweli wa Mungu katika huu wakati wa mwisho atalitangaza Neno lote. Madhehebu yatamchukia. Maneno yake yaweza kuwa makali kama yale ya Yohana Mbatizaji aliywaita majoka. Bali

waliochaguliwa tangu awali watasikia na kuwa tayari kwa kunyakuliwa. Uzao wa Kifalme wa Ibrahimu, wakiwa na imani kama ya Ibrahimu watalishika hilo Neno pamoja naye, kwa kuwa wao walichaguliwa tangu awali pamoja naye.

Mjumbe wa siku za mwisho atakuja katika wakati uliokusudiwa na Mungu. Ni wakati wa mwisho sasa kama wote wanavyojua, kwa maana Israeli wako katika nchi ya uenyeji wao. Kwa wakati wo wote sasa atakuja kulingana na Malaki. Tumwonapo, atakuwa amejitoa kwa ajili ya Neno. Naye atadokezwa (ataonyeshwa katika Neno, Ufunuo 10:7) na Mungu atathibitisha huduma yake. Atahubiri ukweli kama vile Eliya alivyofanya na kuwa tayari kwa shindano dhahiri la Mlima wa Sayuni.

Wengi hawatamfahamu kwa sababu wamefundishwa Maandiko kwa njia fulani ambayo wao hufikiri kwamba ni kweli. Wakati atakapokuja kinyume cha hiyo, hawataamini. Hata wahudumu wengine wa kweli watakosa kumfahamu huyo mjumbe kwa sababu mengi sana yameitwa ukweli wa Mungu na watu wadanganyifu.

Bali huyu nabii atakuja, na kama vile yule mtangulizi wa kule kuja kwa kwanza alivyopaza sauti, "Tazama Mwana-Kondoo wa Mungu aichukuaye dhambi ya ulimwengu," hata hivyo bila shaka yeye atapaza sauti, "Tazama Mwana-Kondoo wa Mungu anayekuja katika utukufu." Naye atafanya jambo hili, kwa maana kama vile Yohana alivyokuwa mjumbe wa ukweli kwa wateule, ndivyo huyu mjumbe wa mwisho alivyo kwa wateule na kwa bibi-arusi aliyezaliwa kwa Neno.

(Kutoka Maelezo ya Nyakati Saba za Kanisa)

SWAHILI

©1992 VGR, ALL RIGHTS RESERVED

VOICE OF GOD RECORDINGS  
P.O. Box 950, Jeffersonville, Indiana 47131 U.S.A.  
[www.branham.org](http://www.branham.org)

## Ilani ya haki ya kunakili

Haki zote zimehifadhiwa. Kitabu hiki kinaweza kuchapishwa kwa matbaa ya nyumbani kwa matumizi ya kibinagsi ama kusambaza, bila malipo, kama chombo cha kuitangazia Injili ya Yesu Kristo. Kitabu hiki hakiwezi kikauzwa, kunakiliwa kwa wingi, kuwekwa kwenye mtandao, kuhifadhiwa kikatolewe tena, kufasiriwa katika lugha zingine ama kutumiwa kuomba fedha bila idhini halisi iliyandikwa moja kwa moja kutoka Voice Of God Recordings®.

Kwa habari zaidi ama kwa vifaa zaidi, tafadhali wasiliana na:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)